

Wiye-wiye pa lok matye i 'Dokumen ma kicoyo iye adot' (ICC-02/04-01/05-474) pi tic me miyo ngec bot lwak

Malube ki lok pa Lakel Adot matye Dokumen ma kicoyo iye adot, kikelo adot 36 ikom Joseph Kony pi bal ikare me mony ki bal ikom dano, ma kibyeko ni otimme oloo ikine nino dwe 1 me dwe me Abiro mwaka 2002 nio i nino dwe 31 me dwe me Apar-wiye-Acel mwaka 2005 i kumalo me Uganda.

Kibyeko ni Joseph Kony oyubu yub kacel ki lumemba mukene pa Lord Resistance Army ("LRA") me timmo kacel dok me tic ki joo mukene, ki bene golo oda ki neno ni lulweny pa LRA gutimo tim ma piny kany, calo:

Monyo akaka reya: neko reya ki temmo neko reya; wunu ki/onyo tero i yoo marac atika dok lanyo reya ki timmo tim gero ikom-gi; keto reya ma kimako ikwo me opii; yako ki balo jami; ki keto dano ikwo matek pi tyen lok me wii-bye dok, bene, malube ki mwaka-gi ki bedo laco onyo dako (adot 1 nio i 14). Kibyeko ni bal magi otimme ikare ma LRA omony Lwala Girls School i onyo ikine nino dwe 24 me dwe me Abicel mwaka 2003 ki kem pa oring ayela ma ilobo ("IDP") kem: (i) Pajule IDP kem, i onyo ikine, nino dwe 10 me dwe me Apar mwaka 2003; (ii) Abia IDP kem, i onyo ikine, nino dwe 4 me dwe me Aryo mwaka 2004; (iii) Barlonyo IDP kem, i onyo ikine, nino dwe 21 me dwe me Aryo mwaka 2004; (iv) Odek IDP kem, i onyo ikine, nino dwe 29 me dwe me Angwen mwaka 2004; (v) Pagak IDP kem, i onyo ikine, nino dwe 16 me dwe me Abic mwaka 2004; (vi) Lukondi IDP kem, i onyo ikine, nino dwe 19 me dwe me Abic mwaka 2004; ki (vii) Abok IDP kem, i onyo ikine, nino dwe 8 me dwe me Abicel mwaka 2004.

Lakel Adot bene kelo adot ikom Ladit Kony pi timmo i yoo marom bal ikom mon mia-ki-mia ki lutino mia-ki-mia ma kibyeko ni kiketo-gi i LRA, ikare mucakke i nino dwe 1 me dwe me Abiro mwaka 2002 nio i nino dwe 31 me dwe me Apar-wiye-Aryo mwaka 2005 i kumalo me Uganda: keto mon ki lutino ikwo me opii; opii me butu ki diyo mon ki anyira inyom; butu tektek ki mon ki anyira; yaco tektek, wunu ki/onyo tero i yoo marac atika dok lanyo mon ki lutino, ki timmo tim gero ikom-gi. Tim man

bene kikelo adot iye ni kacel bedo keto dano ikwo matek pi tyen lok me bedo lacoo onyo dako, ki/onyo pi mwaka. Med ikom meno, Lakel Adot kelo adot pi coyo lutino i LRA, ki tic kwed-gi idog lweny (adot 15 nio i 29).

Me agiki, Lakel Adot kelo adot atir ikom Ladit Kony kikome, pi timmo bal me keto dano i kwo me opii, nyom idic, awun ki opii me butu ikom latin dako mo ikare mucakke i dwe me Abiro mwaka 2003 nio i dwe me Abungwen mwaka 2004 i kumalo me Uganda ki/onyo i Sudan (adot 30 nio i 36).

Dokumen ma kicoyo iye adot ikom Ladit Kony tye i leb English ki leb Acholi i wang internet pa Kot me Wilobo pi Bal.